

BILTEN

ANNA LINDH FONDACIJA BOSANSKOHERCEGOVAČKE MREŽE

Broj 13

april – maj 2025.



Dragi prijatelji/ce,

Pred vama je trinaesto izdanje Informatora bosanskohercegovačke Mreže Anna Lindh Fondacije. (April - maj 2025.)

U njemu se nalaze informacije o aktivnostima članica ALF BiH, informacije koje dobijamo od Sekretarijata ALF, pozivi za aktivnosti, projekte, partnerstva itd...

Informator za sada izlazi na bosanskom-srpskom-hrvatskom jeziku.

Ukoliko želite podijeliti informacije o vašim aktivnostima za naredne brojeve informatora, možete ih slati na: orcuzla@bih.net.ba

Uživajte u čitanju!

U OVOM BROJU:

- **II Tuzlanski Festival Slobode: 3 dana umjetnosti, dijaloga i slobode /dani ALF u BiH**
- **DIS Teatar Banja Luka - "Gospodin Savršeni" - Kada se emocije susretnu sa vještačkom inteligencijom**
PJESNIK U STARKAMA - Promocija knjige "Pjesme i priče sa dna kace" Maria Vranješa
- **PCRC Sarajevo - poziv Škola za mlade Srebrenica**
- **UDIK Sarajevo: Ahmići 32 godine kasnije: Ne u naše ime; Pamtimo zločine u brčanskom Zanatskom centru; Građanska inicijativa za sjećanje i komemoracije**
- **LDA Mostar - LDA Mostar - Ambasadori za neformalno obrazovanje mladih (YAMNFL2); PIROUETTE 2 - KreARTivna Zajednica; VEBY - Virtualne razmjene za mlade Balkana**
- **Nove članice**



II Tuzlanski Festival Slobode: 3 dana umjetnosti, dijaloga i slobode /dani ALF u BiH

Od 26. do 28. aprila 2025. godine, u Tuzli i Banjoj Luci održan je 2. Tuzlanski Festival Slobode, u okviru manifestacije Dani ALF u BiH, pod pokroviteljstvom Bosanskohercegovačke mreže Anna Lindh Fondacije. Festival je okupio mlade iz različitih dijelova Bosne i Hercegovine kroz umjetnost, književnost, pozorište i dijalog, s ciljem afirmacije slobode izražavanja, međukulturalne saradnje i kreativnog aktivizma.



U nedjelju, 27. aprila, radionica "Paint and Peace" okupila je mlade kreativce u Tuzli, pretvarajući jedno popodne u snažnu proslavu slobode, izražavanja i solidarnosti., radionica je pokazala kako umjetnost može biti most među idejama, emocijama i zajedničkim snovima o mirnijem svijetu.



Učesnici su kroz slikanje komunicirali svoje nade, izazove i vizije, pokazujući da umjetnost ima moć povezivanja. "Paint and Peace" ohrabрила je mlade da govore bez riječi — i da slušaju bez predrasuda. Kroz ovu radionicu učesnike su vodile naše Mirela Biković i Nadina Mehić. Atmosfera je bila ispunjena bojama, smijehom i dubokim razgovorima, još jednom potvrđujući da tamo gdje se susretnu kreativnost i sloboda,

nastaje prava čarolija. Festival nastavlja graditi prostore u kojima mladi predvode s maštom, hrabrošću i srcem.



28. aprila u prepunom Park pubu, organizovan je jubilarni, 200. Pub kviz Tuzla, čime je na simboličan i svečan način obilježen mini jubilej jednog od najposjećenijih i najživljih društvenih događaja u gradu.

Veče je proteklo u duhu zajedništva, znanja i zabave. Iako je takmičarski aspekt bio u drugom planu, kvizaška strast nije izostala - u redovnom formatu sa tri kviza po 25 pažljivo pripremljenih pitanja, učesnici su još jednom pokazali impresivno znanje i timski

duh.

Veliko hvala svim kvizašima i kvizašicama koji su svojim prisustvom i pozitivnom energijom obilježili ovu značajnu prekretnicu. Vaša posvećenost i entuzijizam su srce kviz zajednice u Tuzli!

28. je aprila također organizovana i izložba radova sa radionice "Paint and peace" svi posjetitelji Park Puba su od 18:30h mogli da pogledaju divna umjetnička djela naših vrijednih učesnika.

Anna Lindh Fondacija
 Bosanskohercegovačka mreža

2. TUZLANSKI
 FESTIVAL
 SLOBODE
 2025.

**Dani ALF u BiH & 2. Tuzlanski festival slobode
 26.- 28. April**

PROGRAM:

26.04.2025.
 Banja Luka
 Dom omladine Banja Luka
 17:00 Promocija Knjige "Pjesme i priče sa dna kace" Mario Vranjaš - Tuzla
 20:00 Predstava "Uhljebi" DRAFT Teatar Tuzla

27.04.2025.
 Tuzla
 12:00 Radionica "Paint & peace" - Park pub Tuzla (Paint & Višnja)

28.04.2025.
 Tuzla
 18:00 Izložba "Paint & peace" - Park Pub Tuzla
 19:30 Pub kviz Tuzla "Zemlje Mediterana" (Pub Kviz Tuzla)

Banja Luka
 20:00 "Gospodin s(a)vršeni" - koprodukcija DIS Teatar Banja Luka i Harlekin teatar Postojna (ALF Slovenija)



DIS Teatar Banja Luka: "Gospodin Savršeni"- Kada se emocije susretnu sa vještačkom inteligencijom




U aprilu 2025. godine, u Banjoj Luci je realizovana međunarodna koprodukcija u okviru programa mobilnosti umjetnika Fondacije Anna Lindh. Projekat je okupio glumce iz Dis omladinskog pozorišta Banja Luka (Bosna i Hercegovina) i Harlekin teatra iz Postojne (Slovenija), pod umjetničkim vodstvom Nenada Muždeke (Nenno Harlekin).

Tokom jednomjesečnog umjetničkog laboratorija, grupa je istraživala savremene pozorišne metode i uticaj

vještačke inteligencije na emocionalni život mladih. Rezultat je bila svježa i duhovita pozorišna predstava pod nazivom „Gospodin Savršeni“, koja se bavi modernim vezama, ženskim očekivanjima i tankom granicom između stvarnog i vještačkog.

Premijera je održana 26. aprila 2025. u 20 sati u Dis pozorištu u Omladinskom centru u Banjoj Luci. Projekat, koji podržava ALF BiH, predstavlja uspješnu međunarodnu saradnju među mladim umjetnicima.

Predstava je sada spremna za evropsku promotivnu turneju, nastavljajući dijalog o složenom odnosu između ljudi i tehnologije.



PJESNIK U STARKAMA - Promocija knjige “Pjesme i priče sa dna kace” Maria Vranješa

U srijedu, 14.05., u domu mladih u Banja Luci, sa početkom u 19 časova održana je promocija knjige “Pjesme i priče sa dna kace” Maria Vranješa.

Mario Vranješ - pjesnik u starkama i nekadašnji radijski glas Tuzle, čovjek koji piše iz želuca, iz srca i sa dna - gdje ono najdublje i najiskrenije dozrijeva - na promociji je govorio o svom stvaralačkom putu, inspiraciji i svijetu u kojem nastaju njegove pjesme. Bio je to susret sa stihovima koji ne mole za pažnju - oni je osvajaju.

Događaj je organizovan u okviru Dana ALF u BiH, a uz podršku ALF fondacije.



PCRC Sarajevo - poziv Škola za mlade Srebrenica

Povodom obilježavanja 30. godišnjice genocida u Srebrenici, Centar za postkonfliktna istraživanja najavljuje šesto izdanje Škole za mlade Srebrenica.

Ovaj sedmodnevni obrazovni program okupit će mlade iz Bosne i Hercegovine, Zapadnog Balkana i svijeta, pružajući jedinstvenu priliku za učenje i rad na temama tranzicijske pravde, ljudskih prava, prevencije genocida i memorijalizacije.

Šta možete očekivati:

- Lokacije: Sarajevo, Tuzla i Srebrenica
- Datumi: 6. - 12. jul 2025. godine
- Predavanja vrhunskih stručnjaka iz oblasti tranzicijske pravde, izgradnje mira i politika sjećanja
- Učešće na međunarodnoj konferenciji “Srebrenica 1995-2025: Suočavanje s prošlošću”, uz prisustvo svjetski priznatih akademika, pravnih stručnjaka, aktivista, umjetnika i preživjelih.
- Učešće na komemorativnim i multimedijalnim događajima, uključujući izložbe i instalacije posvećene očuvanju sjećanja na žrtve genocida.
- Prisustvo komemoraciji i dženazi 11. jula u Memorijalnom centru Srebrenica.
- Uvid u živote ljudi nakon sukoba kroz susrete s preživjelim i lokalnim zajednicama.

Troškovi i uslovi učešća:

- Poziv je otvoren za mlade od 18 do 30 godina koji imaju radno znanje engleskog jezika
- Potpuno pokriveni troškovi za učesnike iz Bosne i Hercegovine i zemalja Zapadnog Balkana (Srbija, Hrvatska, Crna Gora, Sjeverna Makedonija, Kosovo, Albanija).
- Međunarodni učesnici snose troškove putovanja i participativnu naknadu od 250 EUR, koja pokriva lokalni prijevoz, obroke i smještaj.
- Potpuno prisustvo tokom trajanja programa je obavezno. Prijave će se razmatrati redoslijedom pristizanja po maksimalnog broja učesnika.



Rok za prijavu: 9. juni 2025. do 23:59h. Više informacija i obrazovni obrazac je dostupan [ovdje](#).

UDIK Sarajevo

Ahmići 32 godine kasnije: Ne u naše ime

U srijedu 16. aprila 2025. na Trgu bana Josipa Jelačića u 12:00 sati organizovana je antiratna akcija u znak sjećanja na žrtve Ahmića. Istog dana, u 17:00 sati u Knjižnici i čitaonici Bogdana Ogrizovića u Zagrebu održan je okrugli sto pod nazivom „Zašto je Zagrebu potreban Trg ahmićkih žrtava?“. Govorili su: Marijana Senjak, psihoterapeutkinja koja je specijalizirala traumatsku psihologiju; Tamara Opačić, glavna urednica društvenog magazina Nada i Edvin Kanka Čudić, koordinator UDIK-a. Razgovor je moderirala



Vesna Teršelič, voditeljica *Documente* - Centra za suočavanje s prošlošću. Aktivnosti u povodu trideset i druge godišnjice masakra u Ahmićima organizovali su Centar za žene žrtve rata - ROSA, Zagreb; Udruženje za društvena istraživanja i komunikacije (UDIK), Sarajevo; Centar za građansku hrabrost, Zagreb; *Documenta* - Centar za suočavanje s prošlošću, Zagreb i Ženska mreža Hrvatske.

Pamtimo zločine u brčanskom Zanatskom centru



U okviru Inicijative za komemorisanje civilnih žrtava rata u Brčkom, UDIK je u srijedu 7. maja 2025. u povodu godišnjice ratnih zločina u Brčkom organizovao komemoraciju na mjestu ubistva Hajrudina Muzurovića i Huseina Krše. Tim povodom, u Oslobođenju je izašla osmrtnica u znak sjećanja na ova dva i ostale civile ubijene na ovom mjestu od strane Gorana Jelisića i pripadnika VRS. Tokom komemoracije ponovo je upućen

apel lokalnim vlastima da se ovo mjesto obilježi spomen-pločom. Nakon komemoracije održan je sastanak sa lokalnim političarima i porodicama ubijenih civila. U dnevnom listu


Oslobođenje objavljena je priča koordinatora UDIK-a Edvina Kanke Ćudića pod nazivom „Ubistva u Zanatskom centru“ koja donosi ispovijest Šuhre Ahmetović, sestre ubijenog Brčaka Hajrudina Muzurovića.

Građanska inicijativa za sjećanje i komemoracije

Kako bi nastavio promovisati aktivnu ulogu mladih u društvu, kao i važnost saradnje vladinog i nevladinog sektora, UDIK je pokrenuo mrežu pod nazivom Građanska inicijativa za sjećanje i komemoracije (GISK). Cilj ove inicijative jeste zajednički građanski i politički angažman u kulturi sjećanja, povećanje društvene kohezije i raznolikosti u Bosni i Hercegovini. Budite dio naše inicijative i svojim angažmanom doprinesite boljem suživotu u svojoj sredini. Prijave šalžite na e-mail: prijava.gisk@gmail.com. U aprilu i maju su nastavljene redovne aktivnosti obilaska lokalnih mjesta sjećanja i susreti sa lokalnim akterima, prije svega političkim liderima u zajednici.



GISK



LDA Mostar - Ambasadori za neformalno obrazovanje mladih (YAMNFL2)

Neformalno učenje kao alat za osnaživanje mladih: iskustva iz Soluna i najava lokalnih aktivnosti u Mostaru

U okviru projekta "[Ambasadori za neformalno obrazovanje mladih - faza 2](#)" (YAMNFL2), koji implementira [Agencija lokalne demokratije iz Mostara](#) uz podršku Evropske unije, realizirana je međunarodna studijska posjeta Solunu, Grčka, u periodu od 12. do 17. maja 2025. godine.

Tokom ove aktivnosti, predstavnici organizacija, omladinski radnici i mladi iz različitih zemalja Evrope i Zapadnog Balkana imali su priliku razmijeniti znanja i prakse vezane za upotrebu neformalnog obrazovanja kao alata za osnaživanje mladih, posebno u kontekstu zapošljivosti i samozapošljavanja.

Domaćin posjete bila je organizacija United Societies of Balkans (USB), koja je kroz interaktivne metode i terenske posjete predstavila konkretne primjere dobre prakse. Učesnici su posjetili organizacije koje aktivno koriste neformalno obrazovanje u radu s mladima, kao što su Irida Women's Centre, Odyssey Youth Center, InContACT, Stimuli for Social Change, ActionAid Youth Center i Move-it NGO.

Kroz tematske radionice, grupne diskusije, upoznavanje s lokalnim inicijativama i iskustvima, učesnici su produbili razumijevanje načina na koje se neformalno obrazovanje može koristiti za jačanje kapaciteta mladih i doprinos njihovoj integraciji na tržište rada. Studijska posjeta pokazala je značaj povezivanja organizacija i omladinskih radnika na regionalnom nivou, kao i potrebu za kontinuiranom razmjenom znanja i pristupa u radu s mladima.

Projekat YAMNFL2 nastao je kao nastavak prve faze inicijative i ima za cilj izgradnju kapaciteta omladinskih radnika i mladih iz partnerskih organizacija u Bosni i Hercegovini, Srbiji, Italiji, Grčkoj i Sjevernoj Makedoniji. Fokus projekta je na jačanju uloge mladih kao promotora i ambasadora neformalnog obrazovanja, posebno u kontekstu razvoja preduzetničkih vještina, povećanja zapošljivosti i aktivnog građanstva. Kroz edukativne module, razmjenu znanja i konkretne lokalne aktivnosti, mladi se podstiču da prepoznaju i koriste metode neformalnog obrazovanja kao sredstvo za lični i profesionalni razvoj.



Kao nastavak aktivnosti na lokalnom nivou, Agencija lokalne demokratije Mostar organizuje besplatne radionice za mlade iz Mostara u dobi od 16 do 30 godina, fokusirane na razvoj ključnih vještina zapošljivosti.

Prvi ciklus radionica biće održan 10. i 11. juna/lipnja 2025. godine u periodu od 14:00 do 17:00 sati. Učesnici će imati priliku naučiti kako napisati efektan životopis i motivacijsko pismo, kako se pripremiti za razgovor za posao, kao i razviti vještine poslovnog umrežavanja i javnog nastupa.

Drugi ciklus radionica, koji će se održati 12. i 13. juna/lipnja 2025. godine, fokusira se na napredne vještine i lični razvoj. Aktivnosti uključuju simulacije intervjua, analizu prijave kroz studije slučaja, igre uloga za umrežavanje te optimizaciju profesionalnih online profila na LinkedIn platformi.

Radionice će biti održane u YOUth HUB prostoru LDA Mostar (Fra Ambre Miletića 30), a svi zainteresovani mogu se prijaviti za jedan ili oba ciklusa, u zavisnosti od nivoa prethodnog znanja i iskustva. Prijavni formular dostupan je putem sljedeće poveznice: <https://shorturl.at/hAHXw>, a rok za prijave je 6. juna/lipnja 2025. do 13:00 sati.

Projekat YAMNFL2 ima za cilj jačanje uloge mladih kao aktivnih aktera u svojim zajednicama kroz promociju neformalnog obrazovanja, razmjenu iskustava i razvijanje vještina ključnih za njihovu budućnost. Ove aktivnosti doprinose stvaranju mreže omladinskih ambasadora koji na autentičan i mladima blizak način prenose znanja i motivaciju u lokalne sredine.


PIROUETTE 2 - KreARTivna Zajednica

Pirouette 2 - Od globalnog do lokalnog: Umjetnost kao alat za globalno obrazovanje i društvenu promjenu

Projekat [Pirouette 2 - KreARTivna zajednica](#) predstavlja nastavak uspješne inicijative usmjerene na korištenje performativnih umjetnosti kao inovativnog alata neformalnog obrazovanja u radu s mladima. Kroz ovaj projekat nastoji se osnažiti mlade, omladinske radnike i marginalizirane umjetnike da se aktivno uključe u rješavanje globalnih izazova kao što su rodna neravnopravnost, siromaštvo i klimatske promjene. Ideja projekta proizašla je iz uvjerenja da angažman mladih u društvenim i građanskim pitanjima može postati pokretačka snaga razvoja zajednice i doprinijeti širem razumijevanju i rješavanju globalnih problema.

Poseban fokus stavljen je na povezivanje umjetnosti, obrazovanja i aktivizma. Kroz performativne prakse, učesnicima se pruža prilika da prepoznaju vlastitu ulogu u društvu, razvijaju osjećaj globalnog građanstva te osjete moć kreativnog izraza kao sredstva društvene promjene. U tom duhu, projekat stavlja i jasan akcenat na povećanje vidljivosti i uključivanje marginaliziranih umjetnika u javni i kulturni prostor.

Jedna od ključnih aktivnosti bila je realizacija međunarodnog treninga koji je nedavno održan u Velikom Gaju u Srbiji, u organizaciji partnerske organizacije MAGNET. Tokom višednevnog rada u inspirativnom okruženju @magnethouse.rs, učesnici iz partnerskih zemalja kroz različite umjetničke metode istraživali su kako performativne umjetnosti



moгу doprinijeti osnaživanju zajednica i odgovoriti na važne društvene izazove. Razmjenjivali su iskustva, učili jedni od drugih i zajedno promišljali načine na koje bi naučeno mogli prenijeti u vlastite lokalne kontekste, razvijajući konkretne ideje za djelovanje.



Projekat se implementira u partnerstvu šest organizacija: MAGNET (Srbija), LDA Mostar (Bosna i Hercegovina), Redial Partnership (Irska), Anihbar (Kosovo), Nest Berlin (Njemačka) i Optimisti (Crna Gora), a finansira ga Evropska unija kroz Erasmus+ program. Kroz aktivnosti projekta razvijen je i testiran sveobuhvatan trening paket, organizovana je mobilnost 84 učesnika i kreirane su završne predstave koje kroz umjetnost adresiraju globalna pitanja. Sve aktivnosti doprinose promociji performativnih umjetnosti kao moćnog alata za obrazovanje, dijalog i aktivno građanstvo.

U narednom periodu planiramo prenijeti stečena znanja i iskustva sa treninga u Srbiji na lokalni nivo, kako bismo ih primijenili u našoj zajednici i uključili što veći broj mladih i umjetnika. S obzirom da je projekat tek započeo, sve buduće aktivnosti i mogućnosti biće redovno objavljivane na našim društvenim mrežama, web stranici, kao i na službenim kanalima projekta. Pozivamo sve zainteresovane da nas prate i uključe se u ovu kreativnu i društveno angažovanu inicijativu.


<https://www.facebook.com/pirouetteproject>

<https://www.instagram.com/pirouette.project>

VEBY - Virtualne razmjene za mlade Balkana

Otvaramo vrata digitalnoj inkluziji i međukulturnom razumijevanju

U vremenu kada je svijet prešao u online sferu zbog pandemije, otvorile su se i nove prilike za povezivanje mladih iz različitih konteksta - bez putovanja, ali s istom snagom dijaloga i razmjene. Na toj ideji temelji se trogodišnji projekt [VEBY - Virtualne razmjene za mlade Balkana](#), koji okuplja organizacije iz četiri balkanske zemlje i ima za cilj da osnaži mlade ljude, posebno one sa manjim mogućnostima, za učešće u virtualnim mobilnostima.



Kroz ovaj projekt, LDA Mostar zajedno s partnerima razvija inovativne pristupe za uključivanje mladih iz postkonfliktnih i multikulturalnih sredina u proces neformalnog obrazovanja, dijaloga, kritičkog razmišljanja i razvoja mekih vještina. Kroz obuke i virtualne razmjene, mladi ljudi dobijaju priliku za interakciju sa svojim vršnjacima iz drugih zemalja, uče o važnim temama poput identiteta, stereotipa, medijske pismenosti i aktivnog građanstva - sve to iz sigurnosti svog doma.

Poseban fokus stavljen je na inkluziju mladih sa manje mogućnosti - onih koji se često nalaze na marginama društvenih dešavanja, bilo zbog geografskih, ekonomskih, obrazovnih ili jezičkih barijera. VEBY im pruža šansu da se povežu, izraze, i postanu aktivni akteri u svojim zajednicama i šire.

Do sada su realizirane ključne aktivnosti, poput kick-off sastanka i fokus grupa u Mostaru, te intenzivne obuke za facilitaciju online grupa. Međutim, srce projekta čine virtualne razmjene, gdje su mladi kroz strukturirane susrete istraživali važne teme:

◆ Prva virtualna razmjena održana je u februaru 2025. godine na temu "*Identitet i kulturna osviještenost*", i okupila je 40 mladih iz BiH, Albanije, Grčke i Sjeverne Makedonije. Kroz pet interaktivnih sesija, učesnici su razgovarali o identitetu, predrasudama, kulturološkim razlikama i alatima za interkulturalno razumijevanje. Radionice su bile prostor za razmjenu ličnih iskustava, učenje kroz dijalog i osnaživanje za promociju različitosti.

◆ Druga virtualna razmjena, planirana za april 2025. godine, fokusirat će se na *medijsku pismenost i digitalne kampanje*, s ciljem da mlade osnaži za kritičko sagledavanje informacija i aktivno uključivanje u društveni diskurs putem online alata.

Kao rezultat iskustava i znanja stečenih kroz prve dvije virtualne razmjene, projekt je otvorio novo poglavlje kroz Peertual Exchanges - mini cikluse digitalnih razmjena koje vode upravo mladi facilitatori i facilitatorice iz prve i druge razmjene. Po troje mladih iz svake od partnerskih organizacija, ukupno njih devet, koji su uspješno prošli prethodne treninge i učestvovali u obje razmjene, sada su preuzeli uloge voditelja i kreirali niz tematskih online susreta za svoje vršnjake.

Ovaj novi korak u projektu osmišljen je s ciljem da podrži međuvršnjačko učenje i dodatno osnaži mlade u facilitaciji i prenošenju znanja. Mladi voditelji koriste ono što su naučili o identitetu, kulturnoj svijesti, medijskoj pismenosti i online kampanjama kako bi svojim vršnjacima ponudili prostor za siguran dijalog, razmjenu iskustava i zajedničko učenje kroz teme koje ih zaista zanimaju i dotiču.


Prva u nizu Peertual razmjena upravo je u toku, i to na temu socijalne inkluzije. Organizirana je kao trosejska digitalna razmjena u junu 2025. godine, i predstavlja uvod u ciklus koji će se nastaviti tokom ljeta. Učesnici u ovoj fazi imaju priliku diskutovati o preprekama s kojima se suočavaju mladi s manje mogućnosti i zajednički istraživati načine za jačanje inkluzivnosti u svojim lokalnim sredinama.

U nastavku projekta planirane su još tri tematske razmjene, a mladi iz svih partnerskih zemalja imaju priliku da se prijave i postanu dio tog iskustva:

- 11., 13. i 18. juni 2025. - U.S.B. (Grčka) vodi razmjenu na temu interkulturalnog dijaloga i vrijednosti EU
- 27. juni, 2. i 4. juli 2025. - LDA Mostar (BiH) facilitira sesije o izgradnji mira
- 11., 15. i 17. juli 2025. - TFL (Albanija) organizira razmjenu na temu medijske pismenosti

Svaka razmjena nudi drugačiju perspektivu i priliku da se mladi aktivno uključe u razgovore o pitanjima koja oblikuju njihovu svakodnevicu, kao i da steknu nove vještine i upoznaju vršnjake iz regije.

Za potrebe ovih aktivnosti razvijena je i Peertual Exchanges digitalna platforma - alat koji omogućava jednostavno planiranje, facilitaciju i evaluaciju online razmjena na temelju metodologije neformalnog obrazovanja. Platforma ostaje dostupna i nakon završetka projekta, kao otvoren resurs za sve omladinske radnike, trenere i edukatore koji žele graditi digitalne, participativne i inkluzivne razmjene - vođene mladima, za mlade.



NOVE ČLANICE ALF BiH EKOLOŠKO UDRUŽENJE "JEZERO"


Ekološko udruženje "JEZERO"; EU "JEZERO"

Adresa: Omladinski centar "Šerići" 75275 Šerići

Kontakt osoba Amir Tursunović

Tel: + 387 60 318 88 75

Email: atursuno@gmail.com, tursunovicamila@gmail.com



EU JEZERO je nevladina organizacija koja djeluje na tri međusobno povezana polja: razvoj zajednice, ekologija i rad sa mladim. U proteklih nekoliko godina realizovali smo veći broj projekata među kojima su najznačajniji: Projekat otvaranje Omladinskog centra „Šerići“ i Projekat uređenja sportskih terena „Maoča“, Projekat Primarna prevencija ovisnosti kod mladih...

Za djecu i mlade organizovane su brojne edukativne aktivnosti u Omladinskom centru (kursevi stranih jezika, informatike, kreativne radionice...) kao i u sportske aktivnosti koje se realizuju na sportskim terenima „Maoča“ (tereni za fudbal, košarku, odbojku i stoni tenis). Udruženje je član najveće evropske mreže nevladinih ekoloških omladinskih organizacija YEE (čije je sjedište u Pragu)

Osim toga više od 10 godina udruženje je akreditovano za rad sa mladim u okviru evropskog programa ERASMUS +.

Udruženje "Čuvari osmijeha" Banja Luka

Adresa: Đure Daničića 1, 78000 Banja Luka, Bosna i Hercegovina

Twl/Fax: +387 65 770 887

e-mail: cuvariosmijeha@gmail.com

Kontakt osoba: Odgovorna osoba: Jelena Marković, predsjednica udruženja

Djelatnost: Rad sa mladima i promocija prava svih na kulturu.

O udruženju:

"Čuvari osmijeha" je organizacija sa višedecenijskim iskustvom u radu s mladima, posvećena stvaranju inkluzivnog društva u kojem kultura postaje dostupna svima. Kroz brojne domaće i međunarodne projekte i akcije, Udruženje aktivno doprinosi razvoju kreativnog i humanog okruženja.